

Kloschterräbe

Sujet:

Am agschnallte Velo-Birger- Zmorge loose mer Radio DRS uff UKW

Motto:

Kunnsch mit aim Sujet nit rächt uuse,
machs e Potpourri barad
und em Dichter foht's a gruuse
ab däm Sujetwurschtsalat!!

Wenn e Stadt scho kulinarisch,
sozial und kulturell
iberhaupt nimmen e Star isch,
bruucht's do Abhilf, syg's was's well.

Wenn e Sänder nimme gheert wird
vom Rhy bis aben ins Bergell,
wenn's Radiosälbschtbewusstsy gschteert wird,
muess das ändere, syg's wie's well.

Wemmen im Auti bald zem Naar wird
mit Gurten und au finanziell,
wenn dr Sprit drzue no rar wird,
suechsch en Uuswäg, syg's wo's well.

Me mehti do fir Abhilf Sorge:
die ganzi Stadt loost halt persee
agschnallt am Velo-Birger-Zmorge
Radio DRS uff UKW.

Mit em Ruggsagg uff em Buggel
Rollt d'Familie Audrby
samt em Bebbeli, däm Zwuggel,
am Nyni uff em Märtblatz y.

Uff em Hochrad d'Danten Elsi
langsam d'Freye Strooss yschwänggt,
d'Mary schupft si amme, well si
mit de Bai nit abelängt.

Jä - sogar dr Heer Bernolli
mit sym Veelo Johrgang zäh
duet hit - statt wie sunscht im Zolli –
z'morgen uff em Märtblatz näh.

Au e Stänz und syni Grytte
mache bi däm Rally mit,
kemmen uff de Tandem z'rytte,
Me weiss nie, ob's nit ebbis git.

An die dreyezwanzig Schwoobe
's Ganz syg au no regional
Schunggle singend bis am Oobe:
Rosi, Rosi, Rosi - Rosi noch einmal!

Nur d'Frau Snob sait: Ych perseenlig
fänd mi do heggscht deplaziert,
fir Mii isch halt hit, wie gwehnlig
im Drey Keenig reserviert.

Dä Massefraass bim Roothuus unde
Haig sicher nonen andre Sinn,
het dr Munatius Plancus gfunde,
wo mer en go frooge sinn:

Wenn's im Volgg het aafoo gäre,
hänn die alte Reemer doo,
trotz dr Staatskasse, dr lääre,
au als Broot und Spil bikoo!

Und die neetigi Erlychtig findsch am Zyschtig in
dr Ladärnen-Uusstellig in dr Kongrässhalle. Si isch
Offe vo deMorgen am Nyni bis Zoben am Elfi.
